

CONCIERTO DI SIGLO A CABA Y MI A KEDA DESAPUNTA

Diavierna anochi, diasabra anochi y ayera tardi (casi 4 ora), e maestro-nan Edzel Provence, Norman Moron y Padu del Caribe a presenta nan "Concierto di Siglo". Tabata trata aki di e "Ultimo" concierto di siglo, sinembargo mi ta keda cu e speranza cu Norman Moron den su palabranan na final tabata kiermeen cu despues lo haya "Concierto di Siglo Nobo".

Desapunta mi a keda pasobra di e cantidad **GRANDI DI ARUBANONAN** cu tin riba e isla aki, no por a haya 1500 pa bay mira e artistanan aki cu ta **NOS artistanan**, y cu no tabata tin 15 florin pa paga pa bay mira **NOS ARTISTANAN**, pero ora cu tin artistanan di afo, nan ta dispuesto pa paga 20, 30, 50, 100 dollar y yena stadion, ex Entertainment Center, Conference Center y den e 3 presentacionnan publico di e **GRANDINAN** di nos folklore nos a haya mas o menos 1000 hende.

E comentario mas favorable cu a cay sinembargo tabata e "**honor cu a ser duna na difunto Dominico Herrera**" y con na Aruba a honra artistanan di e otro islanan y aprecia nan.

Diavierna anochi, tanto yiu homber di Dominico Herrera, Dominguin, y ayera anochi e yiu muher Joan, a expresa palabranan di aprecio di nan mama y familia den e sentido casi igual di cu: "**no tin palabra pa expresa con gradecido nos ta pa e homenage duna na Papa. Anochinan cu a yena nos cu hopi emocion y na mes momento cu hopi satisfaccion di a mira y tende cuanto aprecia nos Papa tabata na Aruba. Laga nos spera su su musica, hunto cu musica di artistanan di Aruba, Bonaire y Corsow, lo resona pa semper pa deleite di nos comunidatnan. Laga su musica ta un fuente di inspiracion pa tur nos hobennan, pero mas cu tur cos, laga su musica y recuerdo uni nos tur mas fuerte ainda**".

Ayera tardi/nochi, saliendo di Cas di Cultura, Sra. Vda. Jane Herrera - Neuman hopi emociona, a pidimi pa por favor, gradici pueblo di Aruba, **DIARIO** y Jan Poets, hunto cu esnan envolvi den e presentacionnan aki, principalmente e artistanan y Biblioteca Nacional, pa e cariño y aprecio cu nan a muestra pa Dominico (Herrera q.e.p.d.), y bisa nan "**nos ta stima boso, Aruba**", locual mi ta cumpli cune aki.

TRES ARTISTA.., TRES ESTILO DIFERENTE.

Den e "**Concierto di Siglo**" anterior cu Dominico Herrera, Padu del Caribe y Norman Moron, por a scucha tres artista grandi y cada un cu su estilo. Esey a pasa tambe e biaha aki cu Edzel Provence representando Bonaire y kende a interpreta tambe parti di repertorio di Dominico Herrera.

A conoce Edzel cu ta conoci como pianista di jazz, haciendo su debut publico cu interpretacion di composicionnan di Dominico Herrera, simpel y precioso. E musica cu semper Dominico a keda enfatisa cu ta e "**musica di salon**".

A conoce e mes tipo di musica interpreta pa Padu, cu su entonacion abao y ripiti den octaaf mas halto, combina cu su coremento di escala. Na di tres lugar, e mes musica, interpreta pa un Norman Moron cu

tabata tin como base, musica clasica, y cu ta interpreta tur su cancionnan "**mas yena**" cu modulacionnan (cambiando di tono) durante e cancion, su coremento di scalanan y e arpeggio cu ta bini de vez en cuando.

Tres estilo, tres diferente entonacion, pero pa tres musico cu cada un cu su carera.

Padu del Caribe cu no ta mucho activo mas, Edzel Provence cu tin su tereno di jazz y Norman Moron cu durante 40 aña ta den practica tur dia, tocando tambe tur dia pa su pan di cada dia.

Desapunta mi a keda tambe cu ta Biblioteca Nacional, mester a tuma e iniciativa aki, mula y pa e concierto aki, casi pidi limosna pa por presenta na publico e "**grandinan**" di musica Arubano y Antiano.

Desapunta pa motibo cu ta ser bisa cu "**no tin placa**" keto bay, mientras cu idolonan manera e pianistanan, mester ta musiconan cu gobiernonan mester manda di pais pa pais, cu subsidio di ministerionan di cultura di tanto reino hulandes, Hulanda, Antillas, y di cada isla, pa duna promocion na nos musica.

Orguyoso bo ta sintibo di topa tur e tres presentacionnan cu grupo di turistanan Hulandes cu a mira e presentacionnan na Hulanda y otronan cu nan a invita pa bin cu nan pa mira e concierto den Cas di Cultura. Musica cu segun algun di nan, nunca nan a tende di dje, prome cu e Concierto di siglo na Hulanda y a enamora di dje.

Dominico Herrera ainda prome cu su fayecimento a haya e honor di por a hiba su musica pa cada isla y pa Hulanda. Padu y Norman a logra esaki tambe den e forma di Concierto di Siglo, y awor cu Edsel Provence, e porta ta habri pa duna e maestronan oportunidad di biaha como embahadornan musical o di folklore di nos islanan, promoviendo nos musica, y no laga e Concierto termina akinan y asina.

Ki bunita tabata pa mira na final durante ultimo 3 presentacionnan con publico tabata baila den pareha patras den sala of den corendonan y ayera tardi/nochi hasta dilanti di escenario. Grandi y chiquito gosando y na final e cantidad di grandinan cu a bay braza e artistanan y e cantidad di hobennan cu a bay busca autografo cu nan programa di concierto.

CONCIERTO DI ORO

Mientras cu nos grandinan ta promoviendo nos pais, riba e islanan aki, e siguiente generacion por ta den preparacion.

Ya ta ser papia di e siguiente concierto cu lo mester ta: "**Concierto di Oro**" cu e generacion actual. Si ta Biblioteca mes ta sigui cu su organizacion, anto duna e fondonnan necesario na biblioteca. Pero haci y no priminti so.... Stimula nos artistanan manera debe ser y no tras di fachada di politica, nos artistanan merece e reconocimiento aki riba TUR tereno. Aki tin caminda pa papia cu boca grandi riba: **Intercambio cultural, Culturele Uitwisseling** y e pot di placa tey pa esaki. Use pa nos artistanan y no pa politiqueria.

Juby

AWE POR CUMINZA INSCRIBI PA EMPLEO

ORANJESTAD (AAN): Awe Dialuna 2 di November 1998, lo cuminza cu registracion di personanan pa un empleo.

Esaki ta relaciona cu e proyecto "Progreso Real" di Departamento di Labor. Asina ta duna oportunidad pa personanan inscribi nan mes pa un empleo.

Awe 2 di November ta cuminza cu distrito San Nicolas unda lo inscribi na Hulp Bestuurskantoor, Centro di Bario Lago Heights.

Tambe ta inscribi awe na Tanki Leendert, y esey ta na Centro di Bario Tanki Lender.

Por inscribi tambe na Dakota, y esey ta na Centro di Bario y Deporte Dakota.

Pa mañan 3 di November, por inscribi na Brazil (Centro di Bario Brazil), Savaneta (Centro di Bario Savaneta), y na Oranjestad.

Na Playa, por inscribi na Centro di Bario Playa Pabao, como tambe Centro Educativo Cristian (8'or pa 12'or so), y na ex-Mater Dei Huishoudschool (4'or pa 8'or so).



Fechanan, districtonan y lugarnan di inscripcion

Fecha	Distrito	Lugar
2 di Nov	San Nicolas	Hulp Bestuurskantoor (Sala grandi: Fundacion C.A.S.) Centro di Bario Lago Heights
2 di Nov	Tanki Leendert	Centro di Hubentud Tanki Leendert
2 di Nov	Dakota	Centro di Bario Dakota
3 di Nov	Brasil	Centro di Bario Brasil
3 di Nov	Savaneta	Centro di Bario Savaneta
3 di Nov	Oranjestad	Centro di Bario Playa Pabao Centro Educativo Cristian 8:00-12:00 so (panon di misa catolico na Playa) EPI (ex Mater Dei Huishoudschool) 16:00-20:00 so
4 di Nov	San Nicolas	Hulp Bestuurskantoor (Sala grandi di Fundacion C.A.S.) Centro di Bario Lago Heights
4 di Nov	Paradera	Club Caquetio
4 di Nov	Ayo	Centro di Bario Ayo
5 di Nov	Santa Cruz	Club San Martin Club Trippers
5 di Nov	Oranjestad	Centro di Bario Playa Pabao Centro Educativo Cristian 8:00-12:00 (Panon di misa catolico na Playa) Edificio di Educacion Profesional Intermedio EPI (ex Mater Dei Huishoudschool) 16:00-20:00
6 di Nov	Noord	Hulp Bestuurskantoor Noord Sportvereniging Bubali
6 di Nov	Pos Chiquito	Sportvereniging Universal

Orario: parti mainta di 8:00 te cu 12:00 (cu excepcion di EPI Oranjestad)
parti tardi di 16:00 te cu 20:00 (cu excepcion di Centro Educativo Cristian Oranjestad)

TELEFONNAN DI DIARIO
826747- FAX 828551